



CONSÍGIU REGIONALE DE SARDIGNA

SA DE BÍNDIGHI LEGISLADURAS

N.233

MOTZIONE COCCO Pietro - PITTALIS - DESINI - ANEDDA - RUBIU - ZANCHETTA - USULA - CARTA - DEDONI - COCCO Daniele Secondo subra sa costituzione de sa Consulta interistitutzionale intre is assembleas rappresentativas de Sardigna e de Còrsica.

SU CONSÍGIU REGIONALE

a pustis de s'atòbiu cun is rapresentantes de s'Assemblea de Còrsica fatu in Casteddu su 28 de abriale 2016,

AVERIGUADA sa boluntade comune de s'acarare a pitzu de su benidore de is natziones issoro etotu e de totu s'Europa, a tales de sebestare e cumpartzire camineras a cumone chi piessinnent su megioru de sa vida de is tzitadinos issoro;

AMMENTADA s'amistade e sa punna comune a sa libertade de sèberos liberos de su pòpulu sardu e de cussu corsu, in prus de is figuras istòricas e políticas de Giuanne Maria Angioy e Pascale Paoli, chi fiant istados a tretu de inditare s'andala de una soberania moderna, chi li deghet a is printzipios fundadores de s'Europa de is pòpulos e a cussos chi piessinant su federalismu democràticu;

MANIFESTADU su cumbinchimentu a cumone, in tempos malos e foras de s'ordinàriu che a cussos de immoe, ue s'assentu econòmicu-sotziale de s'Europa est in crisi pro cajones de políticas tzentralistas e de respàrmium, su fraigu de una caminera política cumpartzida diat pòdere èssere de importu mannu pro pesare s'atinu de is àteras natziones subra sa "dibata" a pitzu de sa balia de unu fraigu de una Europa chi no est prus fundada feti a pitzu de interessos econòmicos, ma finas subra sa "valorizzazione" de is pòpulos de Europa;

AVERIGUADU chi:

- finas tropu a fitianu ambas ìsulas ant sufridu is sèberos de organismos foranos chi no ant tentu in contu sa cunsighèntzia indireta econòmica e sotziale in is territòrios, ponende a un'ala e belle istrechende is piessinnos issoro, e chi duncas est netzessàriu chi sa Sardigna e sa Còrsica s'afainent a tales de firmare custa costumàntzia a s'atzentramentu de poderios dae banda de is organismos subranatzionales europeos;
- Sardigna e Còrsica, mancari chi têngiant unu isetu mannu pro more de unu sistema paesagìsticu chi non s'agatat in aterue, sunt intre de is regiones prus pòberas de Europa pro rèditu pro càpite;

CUMBINTOS chi sa sinergia intre de duas terras aici acanta e postas in unu tretu geogràficu istratègicu siat de profetu pro dare impèllida a is economias issoro etotu;

TORRADA A AFIRMARE sa boluntade política comune de andare fache a formas adelantadas de acordu intre is ìsulas inghitzende dae s'esperientzia cumpartzida de autonomismu e federalismu, cun sa punna de unu reconnoschimentu prenu de s'insularidade dae banda de s'Unione europea, che a unu aina atziva pro parare fronte a is desafios de sa globalizzazione e de sa cumpetizione in is mercados mundiales, e poderare políticas de crèschida e isvilupu, mescamente pro trasportos, energia e fiscu;

TORRADU A AFIRMARE in prus chi is sèberos de giudu pro s'isvilupu de su territòriu issoro etotu, che a cussos energèticos, a pitzu de sa mobilitade, de s'isvilupu urbanu e rurale, non si potzant fàghere sena pònnere in mesu is regiones e sa populatzione;

TORRADU A AMMENTARE chi is àmbitos de autonomia chi ddis pertocat finas a immoe conchistados in sede natzionale tocat de ddos defensare e ismanniare pedende prus tretu de autogovernu a is Istados italianu e frantzesu;

POSTU A CRARU chi su gastu in prus chi si depet aguantare in is ìsulas de Còrsica e Sardigna, cunforma a su Continente, podet èssere aparisadu finas cun regimenen fiscales ispetziales, ammitidos in sede europea e apostivados in is Cartas autonomìsticas chi ddis pertocat;

LEADU IN CUNSIDERU chi, nointames is sardos e is corsos apant paradu fronte cun balentia a is dominadores istràngios chi sèculu cun sèculu sunt arribados in is costeras issoro, su fraigu de istados-natzione in època moderna, e s'assentu issoro definitivu a pustis de is duas gherras de su Noighentos, no at lassadu a su pòpulu sardu e a cussu corsu, e non feti issos in Europa, de tènnere unu caminu naturale cara a s'autodeterminatzione;

TORRADU A AMMENTARE chi semper e cando non ddis si podet negare su de èssere natziones cun unu patrimòniu culturale e linguìsticu issoro;

TORRADAS A AFIRMARE is resones de s'ispetzialidade istatutària e de s'identidade e torrada a mentovare su detadu de s'artìculu 22 de sa Carta de is deretos fundamentales, ue s'affirmat chi s'Unione respetat sa diversidade culturale, religiosa e linguìstica, in prus de sa punna, inditada in su Tratadu de Lisbona, de s'afortiamentu de s'amparu e sa promotzione de su patrimòniu linguìsticu e culturale de s'Unione europea in totu sa diversidade sua;

LEADAS IN CUNSIDERU is cartas, is parres e is resoluzioni de is istituzione e de is organizaciones europeas, e prus a notu sa Carta europea de is limbas regionales e minoritàrias de su Consìgiu de Europa (5 de santandria 1992); sa Declaratzione universale subra is deretos linguìsticos (1996); sa Cunventzione cuadru pro s'amparu de is minorias natzionales (1995);

TORRADA A MENTOVARE sa risoluzione n. 301 subra is limbas de minoria, aprovada dae su Parlamentu europeu in sa sessione plenària de su 17-19 de martzu 2010 chi invitat is regiones a: averiguare de ammaniare políticas linguìsticas a tales de garantire una tutela e una promotzione adeguada de is limbas autòctonas presentes in su territòriu issoro; incoragiare unu impreu prus mannu de is limbas regionales o de minoria in s'àmbitu de s'insinnamentu, de s'amministratzione, de is mèdia, de s'economia e de sa vida sotziale; incoragiare su manìgiu bonu de is limbas regionales o de minoria pro is funtzionàrios de su setore pùblicu; pònnere finantziamentos adeguados, a tales de garantire s'offerta de unu insinnamentu de is limbas regionales o de minoria giai dae s'iscola materna; sustènnere sa creazione de iscolas plurilingues, in ue s'insinnamentu in sa limba natzionale est crobadu a letziones fatas in una limba regionale o de minoria; promòvere s'impreu de is limbas regionales o de minoria in is mèdia locales e regionales e in sa vida sotziale e econòmica; promòvere is limbas regionales o de minoria pro more de unu sèberu mannu de atividades culturales, che a ispetàculos teatrales, mustras, fèstival literàrios e cuncursos canoros; incoragiare e promòvere is acordos transfrontalieros chi pertocant s'insinnamentu de is limbas e is cuncàmbios culturales, a tales de isvilupare sa cooperatzione econòmica transfrontaliera;

AFIRMADA sa boluntade de inghitzare unu caminu políticu a cumone pro s'afortiamentu de is soberanias issoro finas pro mèdiu de s'aprovazione de istatutos noos chi torrent a afirmare su ruolu de is assembleas eletivas de Sardigna e Còrsica comente parlamentos de su pòpulu sardu e de cussu corsu, torrende a leare dae unu ghetu modernu e europeista poderios, balores e libertades de is istituziones antigas nostras, esempru biu de punna a sa libertade de is pòpulos nostros, chi in s'istòria feti sa fortza at pòdidu burrare;

LEADU ATU chi sa Sardigna e sa Còrsica, nointames siant crobadas dae unu percursu istòricu parallelu, si pisset a sa conchista de is romanos, a sa dominatzione ispagnola, a su tributu mannu pagadu dae is pòpulos sardu e corsu in sa prima gherra mondiale, no ant fraigadu percursos políticu-istitutzionales comunes acumpridos;

LEADU IN CUNSIDERU chi su fraigu de unu percursu políticu a cumone est destinadu a faddire si no est acumpangiadu dae s'interessamentu parallelu de is tzitadinos pro mèdiu de unu protzessu culturale cumpartzidu punnadu a ammadurare una amistade de pòpulu a tretu de nche barigare sa contingèntzia política;

SUTALINEADA sa netzessidade de pònneru in parte is generatziones noas pro mèdiu de sa connoschèntzia, s'isparginamentu e sa balorizzazione de sa limba, de s'istòria e de is traditziones locales, interessende is iscolas e s'universidade in proetos de chirca e divulgatzione;

TORRADOS A MENTOVARE is contributos de su Presidente de su Consìgiu sardu Gianfranco Ganau, de su Presidente de s'assemblea corsa Ghjuvan Guidu Talamoni, de is presidentes de is grupos políticos de su Consìgiu regionale e de is presidentes de is grupos de s'Assemblea de Còrsica in s'interis de s'atòbiu in premissa,

deliberat

- 1) de aderire a sa nàschida de sa “Consulta sardu-corsa”, pro aprontare atos, documentos, e onni àtera faina cun sa punna de acumprire is obietivos mentovados in premissa, e puru pro s'amparu e sa balorizzazione de is identidades de su pòpulu sardu e de su pòpulu corsu;
- 2) de inditare in is presidentes respetivos de is assembleas regionales e in is presidentes de grupu de su Consìgiu regionale sardu e de s'Assemblea corsa, is cumponentes de sa Consulta chi a s'unanimitade at a dèpere aprovare in sa prima setziada su regulamentu pro su funtzionamentu suo e at a dèpere relatare a is assembleas respetivas subra de is atividades fatas e is obietivos acumpridos onni ses meses;
- 3) de dare mandadu a su presidente de su Consìgiu regionale pro chi, fatu chi siat s'acordu cun su Presidente de s'Assemblea de Còrsica, protzedat a sa convocatzione, intro e no ultres sessanta dies dae s'aprovazione de sa motzione presente, de su primu atòbiu de sa Consulta sardu-corsa.

Casteddu, 26 de aprile 2016

f.du Cocco Pietro, Pittalis, Desini, Anedda, Rubiu,
Zanchetta, Usula, Carta, Dedoni, Cocco
Daniele Secondo

pro còpia cunforme
SU CAPU SERVITZIU ASSEMBLEA